



Broj/Број: 01/2a-50-1-2-27/08
Sarajevo/Сарајево, 3.6.2008.godine

ZAPISNIK

27. sjednice Komisije za vanjske poslove Predstavničkog doma Parlamentarne skupštine Bosne i Hercegovine, održane 3.6.2008.

Sjednica je počela u 12 sati i prisustvovali su joj članovi Komisije: Slavko Matić, Milica Marković, Husein Nanić, Sadik Ahmetović, Denis Bećirović i Azra Alajbegović.
Odsutni su bili: Sefer Halilović, Azra Hadžiahmetović i Milorad Živković.

Osim članova i sekretara Komisije, sjednici su prisustvovali i gosti kao predstavnici resornih državnih ministarstava: Rada Svitlica i Davorka Lasica iz Ministarstva vanjske trgovine i ekonomskih odnosa BiH, Lidija Vignjević iz Instituta za intelektualno vlasništvo BiH, zatim Dragan Vukadin iz Ministarstva sigurnosti BiH, Sanjin Pandžić iz Ministarstva civilnih poslova BiH, Radomir Bogdanović iz Ministarstva vanjskih poslova BiH, Amela Hasić iz Ministarstva za ljudska prava i izbjeglice BiH i Zara Halilović, predstavnica Direkcije za evropske integracije.

Zapisnik je, osim sekretara Komisije Merdžane Iglice, vodila i Aida Sofić, student-stažista NDI-ja.

Nakon uvodnog obraćanja, predsjedavajući je otvorio raspravu o dnevnom redu.

Za sjednicu je jednoglasno usvojen sljedeći

DNEVNI RED

1. Usvajanje Zapisnika 26. sjednice Komisije;
2. Davanje saglasnosti za ratifikaciju Budimpeštanskog sporazuma o međunarodnom priznavanju depozita mikroorganizama radi postupka patentiranja (resorno ministarstvo: Ministarstvo vanjske trgovine i ekonomskih odnosa BiH);
3. Davanje saglasnosti za ratifikaciju Međunarodne konvencije o zaštiti umjetnika izvođača, proizvođača fonograma i radiodifuznih organizacija (resorno ministarstvo: Ministarstvo vanjske trgovine i ekonomskih odnosa BiH);
4. Davanje saglasnosti za ratifikaciju Konvencije o zaštiti proizvođača fonograma od nedozvoljenog umnožavanja njihovih fonograma (resorno ministarstvo: Ministarstvo vanjske trgovine i ekonomskih odnosa BiH);
5. Davanje saglasnosti za ratifikaciju Statuta, Općih principa i Proceduralnih pravila Komisije Codex Alimentarius (resorno ministarstvo: Ministarstvo vanjske trgovine i ekonomskih odnosa BiH);
6. Davanje saglasnosti za ratifikaciju Protokola, koji se odnosi na Madridski sporazum o međunarodnoj registraciji žigova (resorno ministarstvo: Ministarstvo vanjske trgovine i ekonomskih odnosa BiH);

7. Davanje saglasnosti za ratifikaciju Sporazuma između Vijeća ministara BiH i Vlade Republike Makedonije o readmisiji lica koja nezakonito borave (resorno ministarstvo: Ministarstvo sigurnosti BiH);
8. Davanje saglasnosti za ratifikaciju Sporazuma između Vijeća ministara BiH i Vlade Republike Makedonije o saradnji u borbi protiv terorizma, organiziranog kriminala, nelegalne trgovine narkoticima, psihotropnim supstancama i prekursorima, ilegalne migracije i ostalih krivičnih djela (resorno ministarstvo: Ministarstvo sigurnosti BiH);
9. Davanje saglasnosti za ratifikaciju Dvogodišnjeg sporazuma o saradnji (BCA) između Bosne i Hercegovine i Regionalnog ureda Svjetske zdravstvene organizacije za Evropu (resorno ministarstvo: Ministarstvo civilnih poslova BiH);
10. Davanje saglasnosti za ratifikaciju Evropske socijalne povelje (revidirane) – Strazbur, 3. maja 1996. (resorno ministarstvo: Ministarstvo za ljudska prava i izbjeglice BiH);
11. Davanje saglasnosti za ratifikaciju Okvirnog sporazuma između Bosne i Hercegovine i Evropskih zajednica o pravilima saradnje koja se odnosi na finansijsku pomoć EZ-a Bosni i Hercegovini u okviru realizacije pomoći kroz instrumente pretprijetne pomoći (IPA) (predlagač: Direkcija za evropske integracije BiH).

Ad. 1. Usvajanje Zapisnika 26. sjednice Komisije

Zapisnik je usvojen jednoglasno, bez primjedbi.

Ad. 2. Davanje saglasnosti za ratifikaciju Budimpeštanskog sporazuma o međunarodnom priznavanju depozita mikroorganizama radi postupka patentiranja

Predsjedavajući Komisije Slavko Matić pozvao je gosp. Bogdanovića, predstavnika Ministarstva vanjskih poslova BiH, da da opći osvrt i obrazloži sve sporazume i konvencije koje su na dnevnom redu, zbog detaljnijeg objašnjenja.

Predstavnik Ministarstva vanjskih poslova BiH, kratko obrazloživši, izjavio je da su svi sporazumi prošli potrebnu zakonsku proceduru, te predložio da Komisija da pozitivno mišljenje Parlamenta BiH za ratifikaciju ovih sporazuma. Ipak, izdvojio je važnost ratifikacije Evropske socijalne povelje i to revidirane, iz 1996. godine, jer je to do sada već nekoliko puta odgađano zbog proceduralnih i tehničkih prepreka koje su se pojavljivale u ovom procesu, a odnose se na neke članove ove povelje. Kako je ovo jedna od postprijetnih obaveza BiH prema najstarijoj evropskoj instituciji, Vijeću Evrope, njenom ratifikacijom i ona će biti ispunjena.

Nakon što se predsjedavajući Komisije zahvalio gosp. Bogdanoviću, riječ je uzela i predstavnica resornog ministarstva Rada Svitlica, naglašavajući da je ratifikacija Budimpeštanskog sporazuma od ključnog značaja za Bosnu i Hercegovinu, te predložila Komisiji da usvoji zaključak u kojem se predlaže Parlamentarnoj skupštini BiH njegova ratifikacija.

Lidija Vignjević, predstavnica Instituta za intelektualno vlasništvo koji je radio osnove za ratifikaciju, obrazložila je također važnost ovog sporazuma. Istakla je da je Bosna i Hercegovina, težeći da bude punopravna članica Svjetske trgovinske organizacije, obavezna potpisati i ratificirati ovaj sporazum, te uskladiti svoju legislativu s ciljem patentiranja žive materije.

Nakon ovako detaljnih obrazloženja, članovi Komisije su bez primjedbi jednoglasno dali saglasnost za ratifikaciju Budimpeštanskog sporazuma.

Ad. 3. Davanje saglasnosti za ratifikaciju Međunarodne konvencije o zaštiti umjetnika izvođača, proizvođača fonograma i radiodifuznih organizacija

S obzirom da je Institut za intelektualno vlasništvo Bosne i Hercegovine obrađivač ovih konvencija, Lidija Vignjević dala je detaljno objašnjenje o ovom sporazumu. Izjavila je da je Bosna i Hercegovina dužna da uskladi svoju legislativu s ovim konvencijama (Ad.3. i Ad.4.) i sa zahtjevima TRIPS-a kako bi ubrzala svoj integracijski i tranzicijski put.

Nijedna odredba ove konvencije, koja je ujedno i dio Rimske konvencije iz 1961. godine, ne može se tumačiti tako da nanosi povredu zaštiti autorskog prava na književna i umjetnička djela, a sadrži niz beneficija, kako za umjetnike izvođače, proizvođače fonograma i radiodifuznih organizacija, tako i za samu državu Bosnu i Hercegovinu.

Nakon toga, članovi Komisije jednoglasno su prihvatili zaključak koji je predložio predsjedavajući, a to je da se da pozitivno mišljenje za ratifikaciju ove međunarodne konvencije.

Ad. 4. Davanje saglasnosti za ratifikaciju Konvencije o zaštiti proizvođača fonograma od nedozvoljenog umnožavanja njihovih fonograma

S obzirom da je ova tačka dnevnog reda u uskoj vezi s prethodnom, o kojoj je Lidija Vignjević već dala obrazloženje, otvorena je rasprava. Nije bilo prijavljenih za raspravu i saglasnost za ratifikaciju Konvencije data je jednoglasno.

Ad. 5. Davanje saglasnosti za rafikaciju Statuta, Općih principa i Proceduralnih pravila Komisije Codex Alimentarius

Predsjedavajući Komisije dao je riječ predstavnici resornog ministarstva Davorki Lasic, koja je navela da će ratifikacija Statuta, Općih principa i Proceduralnih pravila Komisije Codex Alimentarius olakšati međunarodnu trgovinu hranom, osigurati sigurnost hrane, te za potrošača osigurati zdrave proizvode lišene kvarenja, pravilno etiketiranje i predstavljanje. Codex Alimentarius je zbirka međunarodnouslyvojenih standarda za hranu čiji je cilj zaštita zdravlja potrošača i osiguranje poštene prakse u trgovini hranom.

Sva neophodna procedura je provedena, te je predložila da se da saglasnost za ratifikaciju. Svi članovi Komisije bili su za.

Ad. 6. Davanje saglasnosti za ratifikaciju Protokola, koji se odnosi na Madridski sporazum o međunarodnoj registraciji žigova

Obrazloženje o ovom protokolu dala je Lidija Vignjević, predstavnica Instituta za intelektualno vlasništvo BiH. Naglašavajući hitnost ratifikacije ovog protokola, usvojenog u Madridu 27. juna 1989., navela je da će lice koje podnese prijavu za registraciju žiga u registar Međunarodnog ureda Svjetske organizacije za intelektualno vlasništvo, prema odredbama ovog protokola, moći osigurati zaštitu svog žiga na teritoriji ugovornih stranaka. Ako se uskoro ne potpiše ovaj protokol, neće biti puno interesa za Bosnu i Hercegovinu, izjavila je Lidija Vignjevic.

Nakon obrazloženja predstavnice Instituta za intelektualno vlasništvo Bosne i Hercegovine, predsjedavajući je otvorio raspravu, ali pošto prijavljenih za raspravu nije bilo, jednoglasno je usvojen zaključak da se da pozitivno mišljenje o saglasnosti za ratifikaciju.

Ad. 7. Davanje saglasnosti za ratifikaciju Sporazuma između Vijeća ministara BiH i Vlade Republike Makedonije o readmisiji lica koja nezakonito borave, i

Ad. 8. Davanje saglasnosti za ratifikaciju Sporazuma između Vijeća ministara BiH i Vlade Republike Makedonije o saradnji u borbi protiv terorizma, organiziranog kriminala, nelegalne trgovine narkoticima, psihotropnim supstancama i prekursorima, ilegalne migracije i ostalih krivičnih djela

Obrazloženje oba sporazuma dao je izvjestilac Ministarstva sigurnosti BiH Dragan Vukadin, naglašavajući potrebu njihove ratifikacije, s obzirom da jedino s Republikom Makedonijom nije ostvarena ovakva vrsta saradnje. Radi se o policijskoj saradnji, u okviru koje će se, preko nadležnih tijela (Ministarstvo sigurnosti BiH i Ministarstvo unutrašnjih poslova Republike Makedonije), u skladu s odredbama Sporazuma, saradivati u sprečavanju i otkrivanju krivičnih djela kao što su: terorizam, organizirani kriminal, krivična djela protiv imovine, otmica, iznuđivanje, nelegalna trgovina narkoticima itd. Članovi Komisije su, bez rasprave, jednoglasno usvojili zaključak u kojem daju pozitivno mišljenje za ratifikaciju oba ova sporazuma.

Ad. 9. Davanje saglasnosti za ratifikaciju Dvogodišnjeg sporazuma o saradnji (BCA) između Bosne i Hercegovine i Regionalnog ureda Svjetske zdravstvene organizacije za Evropu

Predstavnik resornog Ministarstva civilnih poslova BiH Sanjin Pandžić dao je obrazloženje o ovoj tački dnevnog reda, te, između ostalog, rekao da je ovaj Dvogodišnji sporazum za period 2008.-2009. dio preliminarnog Srednjoročnog okvira za saradnju Regionalnog ureda WHO za Evropu i Vijeća ministara BiH za period od šest godina – 2008.-2013.

Potom je predsjedavajući Komisije otvorio raspravu. Azru Alajbegović interesiralo je kako se provodi koordinacija s Regionalnim uredom Svjetske zdravstvene organizacije za Evropu, s obzirom da u BiH nema ministarstva zdravstva, ni agencije za javno zdravstvo na državnom nivou. Pandžić je odgovorio da Ministarstvo civilnih poslova BiH koordinira aktivnosti entitetskih ministarstava zdravstva i predstavlja Bosnu i Hercegovinu na međunarodnom nivou na osnovu memoranduma o razumijevanju, potpisanim između državnog Ministarstva civilnih poslova BiH i entitetskih ministarstava zdravstva.

Nakon kratke rasprave, Komisija je jednoglasno dala saglasnost za ratifikaciju Dvogodišnjeg sporazuma.

Ad. 10. Davanje saglasnosti za ratifikaciju Evropske socijalne povelje (revidirane) – Strazbur, 3. maja 1996. godine

Dodatno obrazloženje o ovoj tački dnevnog reda dala je Amela Hasić iz Ministarstva za ljudska prava i izbjeglice BiH. Osiguranje i poštivanje socijalnih prava, koji su predviđeni Evropskom socijalnom poveljom, poboljšat će socijano blagostanje i životni standard radnika, a Bosna i Hercegovina je kao članica Vijeća Evrope dužna ratificirati i staviti na snagu ovu povelju. Navela je također da je ratifikacija Evropske socijalne povelje od vitalnog interesa za ulazak BiH u Evropsku uniju.

Svi prisutni članovi Komisije su, bez rasprave i primjedbi, bili za to da se da saglasnost za ratifikaciju ove povelje.

Ad. 11. Davanje saglasnosti za ratifikaciju Okvirnog sporazuma između Bosne i Hercegovine i Evropskih zajednica o pravilima saradnje koja se odnosi na finansijsku pomoć EZ-a Bosni i Hercegovini u okviru realizacije pomoći kroz instrumente pretprijetne pomoći (IPA)

Zara Halilović, predstavnik Direkcije za evropske integracije, dala je detaljno obrazloženje o ovom sporazumu, navodeći da je on prošao svu potrebnu zakonom predviđenu proceduru, te pozvala Komisiju da da saglasnost za ratifikaciju. Kašnjenje u ratifikaciji znači kašnjenje u pristupu finansijskim sredstvima i pretprijetnim fondovima za period od 2007. do 2013.godine. Ovaj sporazum će, omogućavajući našoj zemlji da ima pristup finansijskim sredstvima EU, samo donijeti i značiti dobrobit i prosperitet za državu Bosnu i Hercegovinu.

Predsjednik Matić stavio je na glasanje ovu tačku dnevnog reda, te je bez primjedbi i rasprave data jednoglasna saglasnost za ratifikaciju ovog sporazuma.

Na kraju sjednice je sekretar Komisije Merdzana Iglica iskoristila prisustvo predstavnika resornih državnih ministarstava, kao i predstavnika MVP-a BiH kako bi upozorila na ubrzavanje procesa stavljanja u proceduru još dva veoma važna međunarodna sporazuma: Konvencije o očuvanju nematerijalnog kulturnog naslijeđa i Konvencije za zaštitu podvodnog kulturnog naslijeđa, na šta je ukazalo Ministarstvo vanjskih poslova BiH.

Sjednica je završena u 13,10 sati.

Zapisnik sačinila: Aida Sofić, student-stažista

Sekretar Komisije

Merdžana Iglica

Predsjedavajući Komisije

Slavko Matić